




HKBP
DISTRIK VIII DKI JAKARTA
PARTURE NI ACARA
PARNINGOTAN ARI HAMAMATE
NI TUHAN JESUS



TOSMAHOSANA
(Markus 15:33-41)

Jumat, 18 April 2025

01. JOUJOU TU PARSAORAN (L: Liturgis; R: Ruas)

- L : Huria ni Kristus! Di Ari Parningotan Hamamate ni Tuhan Jesus sadari on, itahalashon do balga ni holong ni roha na binasabasahon ni Tuhanta tu hita, ai rade Ibana mate di hau pinarsilang laho mamorsan dosanta.
- R : *Ingkon pujionta do Tuhan i ala ni asi ni rohaNa dohot halongangan angka na binahenNa tu hita.*
- L : Hamamate ni Jesus papatarhon holong ni rohaNa i di hita, uju pardosa dope hita, ai disi do mate Kristus manghophop hita. Alani tama mauliate rohanta tu Ibana, jala pujionta GoarNa. Alani taendehon ma “Jesusku naung manobus au”
- R : (mangendehon) BE. No. 88:1-2 “Jesusku Naung Manobus au” BL. 106
Jesusku naung manobus ahu sai naeng haholonganku Ho. Tu dolok Golgata Ho laho ni onjar ni holongMu do Hupuji nasa asiMi alai gumodang holongMi
-----jongjong-----
Tarsolsolbagi do rohangku paidaida dangolMi Marningot sasude dosangku ai i do na tinaonMi.
Hupuji nasa asiMi alai gumodang holongMi

02. VOTUM INTROITUS TANGIANG

- L : Marhitehite goar ni Debata Ama, dohot goar ni anakNa Tuhan Jesus Kristus, dohot goar ni Tondi Parbadia, na tumompa langit dohot tano on, Amen. Na gabe pangoloi do Kristus paima mate, pola tung mate tarsilang. Didia angka soropmi ale hamatean? Didia pangagoonmu ale banuatoru? ***haleluya***

R : (mangendehon) *HALELUYA, HALELUYA, HALELUYA*

L : Martangiang ma hita! O Tuhan Jesus birubiru ni Debata, na mamorsan dosanami. Na jongjong do hami di joloM marningot Ho, na gantung i. Tangkas do huantusi hami habebornit ni na tinaonMu di dolok Golgata. Tungki do hami marningot dosanami na manghorhon hamamateMi. Asi ma rohaM, urupi ma hami, asa gabe upa ni halojaonMu hami. Amen.

-----hundul-----

03. Marende BE.No.84:1 “Aut na ginorga tu rohangku” BL.195

Aut na ginorga tu rohangku, bohiM di na lao mate Ho. Aut na huingot o Tuhanhu tongtong panghophopMi di au. Ai Ho do paluahon ahu dosangku do pinorsanMi. Didaoni Ho parsahitonhu, martua au binahen ni i.

04. PATIK:

L : Tangihon hamu ma patik ni Debata, ima na tarsurat di Heber 12:2 *“Tabereng ma induk ni haporseaon i jala na paujunghonsa, ima Jesus na manaonhon parsilangan i, singkat ni las ni roha tohapNa i hian, so dietong i hilaon, gabe hundul di siamun ni habangsa ni Debata.”.*

Antong rap mangido gogo ma hita tu Debata mangualahon patikNa

L+R : Ale Tuhan Debata, sai pargogoi ma hami mangualahon na hombar tu patikMi, Amen

05. Marende BE.No.412:1-2 “Ndi di dolok adui” BL. 387

Ndi di dolok adui silang ni Tuhan i sap mudar sap tijur do i. Jesus mate disi asa malum dibaen sude angka gondok roha i. Ref: Dibaen i tung holong rohangki mida silang di Golgata i. Hupasolhot diringku tusi dompak surge pardalanahi.

-----jongjong-----

Dileai jolma i silang ni Tuhan i, hape haluaon do i. Nang godang dosangki, alai sesa do i dibaen mudar na durus disi. Ref: Dibaen i.....d.u...

06. MANOPOTI DOSA

L : Tatopoti ma dosanta, martangiang ma hita! Ale Debata Amanami Parasiroha na sumurung! Na pungu do hami di joloM martangiang tu Ho, ndada mangasahon hatigorannami, na mangasahon asi ni rohaM na godang i do.

R : *Sai marasi ni roha ma Ho mida hami on, o Tuhan Jesus Birubiru ni Debata na mamorsan dosanami.*

L : Sai pasunggulhon ma tongtong tu rohanami panghophopMi di hami, asa margogo hami mangulahon lomo ni rohaM, ala ni Jesus Kristus Tuhannami, Amen

Bagabaga ni Debata taringot tu hasesaan ni dosanta: Humophop hita gabe dosa do Ibana na so tumanda dosa dibahen Debata, asa gabe hatigoran ni Debata hita marhitehite Ibana. Hasangapon ma di Debata na di ginjang.

L+R : Amen.-

07. Marende BE.No. 459:3 "Sonang do Langkalangkanku BL. 310

Malum au dibaen bugangNa ias dibaen mudar i. Tung na sonang do rohangku Jesus pardameanhi. Dihosomi jolma au insakinsak ndang boi so. Haleaon ni Tuhanhu olo porsanonhu do.

08. EPISTEL:

- L : Hata ni Debata, turpuk di ari Parningotan Hamamate ni Tuhan Jesus sadari on, ima na tarsurat di Sakaria 9:11-17 : Ho pe marhitehite * mudar ni parpadanonmu paluaonku angka na tarbuang sian ho, sian godung na so marisi aek.
- R : Mulak ma hamu tu huta na gonting, hamu ale angka na tarrante na marpangkirimon dope! Gari sadarion ahu mamaritahon hian: * Silompit dua do pasuangonku tu ho.
- L : Ai hira sior husintak Juda di ahu, jala huparade ia Epraim tu parporangan, jala husunggul angka anakmi, ale Sion, dompak angka anakmu, * ale tano Junani jala bahenonku ma ho hira podang ni ulubalang.
- R : Jadi tarida ma Jahowa di atas nasida, jala * ruar sumbiana, songon hilap, jala * paluon ni Tuhan Jahowa ma sarune, jala marhitehon angka habahaba sian dangsina ibana mardalan.
- L : Jahowa Zebaot mangondingi nasida, gabe suda panganonnasida jala luntakhononku angka batu ni ambalang; jala minum nasida jala marhariburon hira sian anggur, gabe gok nasida songon saoran pangurasan, songon angka suhi ni langgatan.
- R : Jadi di ari na sasada i lehonon ni Jahowa, Debatanasida ma tua tu nasida, songon tu parduan birubiru ni bangsona, ai angka batu ni tumpal do nasida, angka na gabe partonggol di atas ni tanona..
- L : *Ima sahatna. Martua do angka na tumangihon Hata ni Debata jala na umpeopsa, Amen*

09. Marende BE. No. 83:4 "Na lao do Birubiru i" BL. 214 (jongjong)

Saleleng na mangolu au naeng ingotonhu Jesus. Sude na binaenMi di au hataM naeng hupatulus. Ho naeng haholonganhu do, huhut ihuthononhu do di dalam hangoluan. Tung ingkon Ho nampuna au mangolu manang mate au, sai Ho do tioponhu.

10. MANGHATINDANGHON HAPORSEAON

L : Tahatindanghon ma haporseaonta i, songon na hinatindanghon ni donganta sahaporseaon di sandok portibi on, rap ma hita mandok

L & R : Ahu porsea di Debata Jahowa.....d.u.....Amen
-----hundul-----

11. KOOR :

12. SUNGGUL - SUNGGUL

13. KOOR :

14. Marende BE. No.81: 1--- “Jesus mual ni ngolungku” BL. 185 (pasahat pelean Ia, Ib)

Jesus mual ni ngolungku, Sipangolu tondingki. Ai dibunu Ho musungku, ima hamateani. Ho manaoni hamagoan, patupahon hangoluan. Alani hupuji Ho, tung marribu hali do.

-----musik/elekton-----

Haleaon, insakhinsak, reherehe, tijur pe. Tali dohot pastappastap, tung ditaonhon Ho sude. Paluahon au na pogos, sian tangan ni sibolis. Alani hupuji Ho, tung marribu hali do.

-----musik/elekton---

Bugang sada tanggurungmu. Di na hona linsing i Hamamalum ni bugangku Na di rohangki do i Ho do gabe binuraan, au dapotan hangoluan. Ala ni hupuji Ho tung marribu hali do

-----musik/elekton-----

Sungsang duri ditumpalhon panginsahi i tu Ho. Jala tolong dilibashon tu uluM, pasiak Ho. I ditaonhon Ho, Tuhanku. ala ni hajungkatonku. Ala ni hupuji Ho Tung marribu hali do.

-----musik/elekton-----

Tung tanganMu dohot patMu ditorusi labang i. Jadi tiris ma mudarMu, sian hau parsilang i. I do mual paridian di aujolma na hansitan. Ala ni hupuji Ho Tung marribu hali do

15. Jamita: MARKUS 15:33-41

16. Marende BE. No.86:1—"Silang na badia i" BL. 67 (p.pelean II)

Silang na badia i Ho do lombulombungki. Maralohon dosa i dohot pandelean i. Di sude sitaonon i Ho ma lombulombungki

Nasa na huula i ndang tau hasonanganki. Nang ringkot pe rohangki, pola ro nang ilungki. Holan asi ni rohaM Pangurupi o, Tuhan

-----musik/electon-----

Nasa na huula i ndang tau hasonanganki. Nang ringkot pe rohangki pola ro nang ilungki. Holan asi ni rohaM Pangurupi o, Tuhan

-----musik/elekton-----

Ro do au nuaeng tu ho, sai palambas ma rohaM. Nunga pola mate Ho, ala asi ni rohaM. Jangkon au na dangol on, sai ulosi tondingkon.

-----musik/elekton-----

Dosa patundukkon au, ho ma mangondihon au. Ramun situtu do au, mudarMi mamuri au, Na pogos, Dangol au on. Ho ma artangki tongtong.

-----musik/elekton-----

Silang na badia i Ho do lombulombungki. Molo puas hodokki, di na suda bohalhi. Di sude sitaonon i Ho ma lombulombungki

17.TANGIANG: Pelean, Hamamate ni Jesus, Ale Amanami, Pasupasu

(Mangulon ma jolo hitasatongkin andorang so ta uduti tu Ulaon Nabadia)

ULAON NA BADIA.

U: Huria ni Tuhanta, di Ari parningotan hamamate ni Tuhan Jesus sadarion, udutanta ma tu ulaon na badia, hombar tu na tinonahon ni Tuhan Jesus tu angka siseanNa andorang so di tangkup Ibana. Ulaon na badia ima: Parningotan tu Tuhan Jesus Kristus, tanda hasesaan ni dosa, dohot padan na imbaru taringot tu hangoluan na so ra suda.

1. Marende BE No. 179:1-2 “Adong do sada mual i” BL. 20

Adong do sada mual i, di na mardosa i. Mansai dengen do mual i, pasonang rohangki

Aek mual na badia i, i ma di Jesus i. Disesa do tihasta i, dibuat arsak i

2. Agenda: Pangaradeon diri

3. Marende BE No 153:1 “O JESUS NAUNG SINEAT”

*O Jesus naung sineat, di hau na pinarsilang
rohaM tongtong daulat, nang uju Ho tarsilang
Marutang hosa hami, ditaon Ho dosanami, asi rohaM o
Jesus*

4. Agenda: Manjalo ulaon na Badia

5. Manganhon parpadanan na badia dohot angka ende di tingki manjalo ulaon na badia

Ende No.154: 1 – 4 “Sai Palinggas ho tondingku” BL. 190

Sai palinggas ho tondingku, sai tadingkon ma arsakmu./ Ro ma ho tu hatorangan,asa dapot hasonangan./ Ai tarontang ho saonari, tu haroan na badia,/ Na manggomgom parluhutan, naeng tu ho do maringanan.

Sai ringkoti ma manomu, na pangolu ho tondingku/ Na manuktuk do Ibana, di roham dibaen hataNa./ Ungkap pintu ni rohamu, asa bongot ma Rajamu,/ Dok: Ingani ma rohangku, unang be tadingkononMu.

Sai malungun do rohangku, Ale Jesus di basaMu./ Tung na tangis do rohangku, na malungun do mannaMu./ Na mauas do tondingku, ale Jesus di mudarMu./ Pinangido ni rohangku, hasasaor tu Debatangku.

Las huhut do angka hitir, rohangkon di na hupingkir./ Simosimo ni panganon, di bagasan parpadanan./ Ai na so tardodo roha, pinatupa ni Jahowa./ Ingkon Tondi Parbadia, pabotohon i tu iba.

Ende No. 155: 1 – 4 “Naung moru do muse sataon” BL. 192

Tu son ma ale tondingku, di na mauas, male ho/ Manjalo basa ni Tuhanmu pinaradeNa i di ho./ Dilehon Jesus do dagingNa, marhitehite roti on,/ Dilehon dohot do mudarNa, marhitehite angguron.

Ai nang tongtong pe ganup ari, mudarNa mangurasi au./ Huhut Ibana so mansadi manogu tu lambungNa au./ Sai naeng au mangan parpadanan ni Jesus Kristus, Tuhanki./ Na padamehon parbadaan, na pasonangkon rohangki.

Asi rohaM di au o Jesus, tumpahi au sadari on. Ai hataMi do hupatulul, manganhon parpadanan on. Antong patuur ma rohangku, marningot denggan ni basaM. I ma na tinaonMi dosangku, binaen ni holong ni rohaM.

Patogu haporseaonku, di hasasae ni dosangki. Marsitiopan baen rohangku, di mudarMi na durus i. Sai ro ma Ho ale Tuhanku, marhite parpadanan on. JoroM ma baen nuaeng rohangku. Ho ma nampuna au tongtong

Ende No. 174: 1 – 4 “Torop dope na siat i” BL. 184

Torop do pe na siat i Di hasampuran rea/ I pe hamu pardosa i Sai olo ma porsea/ Ai Debata manjou hamu Tu hasonangan situtu/ Hamu, hamu Dijou Debatamu.

Tama longang roham, ale Umbege pangontangna/ Antong sai unang jua pe Tangihon pamiona/ Ai Debata mamio ho Dibahen i sai ro ma ho/ Sai ro, sai ro Tu surgo ma ho ro.

Pardosa ho didok roham, na so tama be dohot?/ Ndang pola ala ni dosam, umbaen na sundat bongot./ Ai nunga sae do dosam i, digarar Tuhan Jesus Naung sae, naung sae, naung sae do dosami.

Haporseai ma hata i Ai i do hatuaon/ Haposi Tuhan Jesus i MudarNa i ma golom/ Ai nang gok dosa rohami Malua ho bahenon ni/ Tutu, tutu Malua baenon ni.

Ende. 169:1-3 “Ho Sipangolu au” BL. 224

Ho sipangolu au, sai topot ma au on./ Sai unang mandaodao. Ho sian rohangkon./ Ro Sipangolu ro tibu. Baen ma au anakMu tutu./ Dohot mudarMi buri au ias songon hapas ma au. / Ias tutu, ias tutu, dohot mudarMi buri au. Ias songon hapas ma au

*Gogo ni mudarMi Papatar ma di au/ Tondi Parngolu i Tongtong
manogu au/ Ro Sipangolu ro tibu...d.u.*

*Togu ma rohangkon Sai taiti au tu Ho/ Ai langkaMi tongtong
Naeng tiruonku do/ Ro Sipangolu ro tibu...d.u.*

**Ende Pujipujian: BE. No. 9:1 “Hupuji holong ni” BL. 110
(jongjong)**

*Hupuji holong ni rohaMu o Tuhan Jesus Rajangki. Tu Ho hulehon
ma tondingku ai ido pinangidoMi. Huhakupahon ma diringku,
mamingkir holong ni rohaMu.*

6. Tangiang Panutup (Pasupasu)

PRAESES
&
SUDE PARHOBAS NA GOK TINGKI
HKBP DISTRIK VIII DKI JAKARTA

Pasahathon:

Horas ma hita mangauhon
Panghophopon ni Jesus